

見之事也 祖宗之垂休錫衍臣民之沐澤含恩豈但淪浹肌骨而已
哉 本朝 世宗大王三十年羣臣稱慶而 賀逮夫 中宗大王二
十九年羣臣又請援例陳 賀 王世子率百官進宴此皆已行之盛
禮 皇朝寶典亦載 高皇帝二十五年 世宗皇帝三十年四十年
并准禮部 奏請而行之其禮並殷其在今日為可闕而不行乎伏願
聖上亟遵 祖宗之典禮以慰臣民之至情不勝幸甚頃者 國事搶
攘邊憂未紓使莫大之禮始茲於今日實為欠典大臣之意如此敢
啓 傳曰今與古異不可引不當引之例為此不必為之事○京畿監
司李廷龜馳 啓水原府使李慶濬牒呈內今月二十二日初更時天
上南末有赤氣一道光如火焰狀如匹練或經天或半天俄而又有一
道繼起其狀如初三更乃滅而焰光所燭之處明若微月之色變異非
常事○以韓德遠為漢城府左尹李忠養為侍講院文學趙識為弘文
館副校理申光立為司諫院正言任充為禮曹佐郎李植立為兵曹佐
郎李惕為兵曹佐郎李殷老為司憲府監察